

外孫爲昆弟願與公主女俱入朝元康元年遂來朝賀  
王及夫人皆賜印綬夫人號稱公主賜以車騎旗鼓歌  
吹數十人綺繡雜繒琦珍凡數千萬

師古曰琦音奇

留且一年

厚贈送之後數來朝賀樂漢衣服制度歸其國治宮室  
作徼道周衛出入傳呼撞鍾鼓如漢家儀外國胡人皆  
曰驢非驢馬非馬若龜茲王所謂羸也絳賓死其子丞  
德自謂漢外孫成哀帝時往來尤數漢遇之亦甚親密  
東通尉犁六百五十里

尉犁國王治尉犁城去長安六千七百五十里戶千二  
百口九千六百勝兵二千人尉犁侯安世侯左右將左